

春秋屬辭辨例編

春秋屬辭辨例編卷六十目錄

闕文誤文

日食闕日朔穀梁說辨 外諸侯卒闕名左氏說辨 夫人閔姓氏三傳說辨 王不稱天胡氏說辨

桓十四年不書王說辨 桓昭定不書秋冬說辨 秦鄭晉伐國闕將帥說辨 何休解公羊多曲說辨 孔子因史闕不盡然辨 公穀書孔子生辨

時闕

桓四年七年昭十年定十四年闕時何賈程胡說辨 戰奚闕夏字賈說辨 成十年公羊闕時何說辨

日月並闕 誤文見卷一另門

月闕 紀姜歸京師闕月程子說辨 夏五傳疑辨

日闕

日月下闕事

桓五年正月甲戌巳丑三傳說辨 莊二十二

日食闕日朔

公羊以爲失之前後穀梁以爲晦夜食辨

一日兩事重書日羨文 穀梁說辨

王不稱天闕文三 程胡說辨

桓凡十四年不書王 公穀程杜諸說辨

夫人姓氏闕文誤文 三傳賈孫諸說辨 附內女繫國闕文

外諸侯爵號名諡闕文誤文衍文公會外盟闕文

紀子伯杜穀程趙說辨 是來三傳程胡說辨 葬蔡桓侯
何啖說辨 盟幽盟翟泉程胡說辨 齊人伐山戎齊侯獻
戎捷二傳說辨 郭公二傳說辨 外諸侯卒屬名左氏說
辨 諸侯出奔闕名舊說辨

公如衍文闕文 王子王臣誤文

內大夫闕名衍文 仲孫忌公羊說辨

外大夫闕名闕國名衍文誤文 黑肱闕書邾公穀說辨 魏
多公羊說辨

執諸侯衍文 殺大夫闕名 公羊曹宋二說辨穀梁曹宋
說辨 左杜陳氏說辨

兵事闕文衍文誤文 與宋人闕田字說辨 敗秦公羊說辨
救陳宋闕宋胡傳說辨

弑君誤文 昏禮城蒐盟地闕文衍文誤文 盟于劉衍誤辨

春秋屬辭辨例編卷六十

錢唐張應昌學

闕文誤文

日食闕日朔穀梁說辨
夫人闕姓氏三傳說辨

外諸侯卒闕名左氏說辨
王不稱天胡氏說辨

桓十四年不書王說辨
桓昭定不書秋冬說辨
秦鄭晉伐國闕將帥說辨
何休解公羊多曲說辨
孔子因史闕不盡然辨
公穀書孔子生辨

曰多聞闕疑曰史闕文聖人之訓也後儒說經不闕其所當闕強通其所不可通春秋傳者三家文已多異古書口述或以音近而致譌簡篆相承或以字似而成誤況乎經所書如此而傳所說如彼必爲說以合之有反爲經之害者矣

王樵輯傳
卷首凡例

桓四年七年無秋冬定十四年無冬桓十七年夏五闕月莊二十二年夏五月下闕事僖二十八年書王申不繫月桓十年五月不繫夏昭十二年十二月不繫冬與凡日食不繫朔與日者皆闕也

又引崔子方

闕文有二有史失之經不能益者有經成亡之後世不敢益者桓書

五月而無夏昭書十二月而無冬有月無時豈時不可推乎僖書王申公朝于王所以上五月癸丑推之知其爲十月而不書定書辛巳葬定姒以上九月丁巳推之亦知其爲十月而不書有日無月豈月不可推乎史失之經可推而益也而闕焉非經成後亡之者歟

葉夢得傳

杜預解左氏每遇闕文則曰史闕范甯解穀梁每遇闕文則曰甯所未詳獨何休解公羊以爲春秋皆無闕文隻字片簡偶有墜佚則曲爲之說以附會於經桓十七年之五月不書夏則曰月不繫時者文姜不繫之桓也僖二十八年之冬有壬申之日而無月則曰日不繫月者諸侯不繫之周也昭十年之無冬則歸咎於昭公之不郊定十四年之無冬則歸咎於季桓之受女樂技始窮矣

陳則通提綱

桓公十四年夏五鄭伯使其弟語來盟左氏傳曰夏鄭子人來尋盟蓋夏五無月日者闕文也左氏亦止言夏而不言月日則是左氏作

傳時經已闕月日矣莊公二十四年冬書郭公而左氏無傳蓋亦經之闕文也僖公元年十有二月丁巳夫人氏之喪至自齊左氏傳亦言夫人氏而不言姜是左氏作傳時經已闕姜字矣以此知作經已久經之文已闕而不可知然後傳始作也

王觀國學林

經文有殘缺者有增衍者有舛誤者不可盡知如夏五郭公有秋無冬無冬有月之類此殘缺之明證也桓十三年十一月之再書丙戌此增衍之明證也隱三年之書月日前後不合此舛誤之明證也其可考者如此必有不止于此者而不可考也又如紀子伯仲孫忌之爲闕文蔡桓侯蔡侯申之爲誤文此又可以理推而知也其可推者如此必有不止于此者而不可推也

朱朝瑛畧說

夏五仲孫忌正月無王之類皆闕於孔子後者也否則孔子必益之矣諸侯卒不名日食不書朔不書日之類皆闕於孔子前者也孔子

無由而益矣

郝懿行說
畧桓三年

春秋文多闕誤三傳類多附會而公穀尤甚由不知闕文故也蓋嘗推而論之日食闕書日朔者凡十本史失之而穀梁則曰言日不言朔食晦日也言朔不言日食既朔也案自襄十五年以後無不書日朔者豈自此至獲麟近百年總無食于前食于後而獨參差不定於襄以前乎則穀梁之說非也外諸侯卒闕書名者凡十亦史失之而左氏則曰不書名未同盟也案隱元年及宋人盟于宿而八年宿男卒不名成十三年滕會諸侯同伐秦而十六年滕子卒不名杞與魯結昏而僖二十三年杞成公卒不名則左氏之說非也夫人不書姜氏及去姜存氏去氏存姜者凡四而左傳則曰不稱姜氏絕不爲親禮也賈逵又云哀姜殺子罪輕故但貶去姜公穀又以出姜不宜成禮于齊穆姜不宜從夫喪娶故俱貶去氏夫去姜存氏去氏存姜不

成文理况文姜哀姜之罪豈待去其姓氏而明至夫人方爲處女事
由父母而必責其問合禮與否無乃蹈拊騶移日之譏乎亦拘固不
通甚矣王不稱天者凡六其三史脫之其三從省文而胡氏於錫桓
公命歸成風之贈及會葬則云聖人去天以示貶夫歸仲子之贈王
已稱天矣豈於前獨罪宰咺而于王無貶於此數事又獨責天王而
于榮召無譏乎桓五年三國從王伐鄭此自省文爾與公朝于王所
同義而胡氏以爲桓王失天討豈朝于王所不責諸侯而反責王乎
必以桓十四年不書王爲責桓無王則宣亦篡弑何以書王必以桓
四年七年不書秋冬爲責王失刑則昭十年不書冬定十四年不書
冬又何以說秦伐晉鄭伐許晉伐鮮虞皆是偶闕人字而公穀以爲
狄之夫秦且無論晉之罪莫大于助亂臣立君襄十四年會孫林父
于戚以定衛當日不聞狄晉鄭伯射王中肩未嘗有微辭貶示而沾

沽責其伐許伐鮮虞亦可謂舍其大而圖其細矣凡此皆公穀倡之而後來諸儒如孔氏穎達啖氏助趙氏匡陸氏淳孫氏復劉氏敞亦既辨之矣而復大熾於宋之中葉者蓋亦有故焉自諸儒攻擊三傳王介甫遂目春秋爲斷爛朝報不列學宮文定反之矯枉過正遂舉聖經之斷闕不全者皆以爲精義所存復公穀之故說而呂氏東萊葉氏少蘊張氏元德諸儒俱從之由是春秋稍明於唐以後者復晦昧於宋之南渡夫蔑棄聖人之經與過崇聖人之經其用心不同而其未得乎聖人垂世立教之旨則一也今於南渡以後兼取黃氏仲炎呂氏大圭程氏端學俞氏阜齊氏履謙五家列闕文各條學者於此不强求其通則於諸儒支離穿鑿之論亦掃除過半矣

顧樞高
大事表

案孔氏穎達曰春秋闕文有二有史本闕聖人因而不改者有修成後始闕者愚謂史闕而聖人因之無是理也孔子修春秋垂訓百世

必擇其善可爲法惡可爲戒者書之若前史有關宜并削而不錄此何關勸懲而書之以惑誤來世故知皆修成以後闕也蓋春秋自脩成以後爲孔氏之私書又定哀以後多有所刺譏隱諱故當時游夏不能贊一辭而曾子子思亦無一語及春秋至孟子始標出知我罪我及其義竊取之言是時去孔子已百年矣左氏約生在孟子前後故已有以紀子伯爲履綸之字以甲戌己丑爲再赴而公穀則生于漢時據所傳聞謬誤尤甚幸左氏爲史官得見列國之史與魯未筆削之春秋此二書皆掌於官中其義雖不存而文之闕誤則無有故左氏得據爲傳其日月與經互異往往傳是而經誤此尤顯然可見者孔子嘗自言曰辭達而已矣若春秋之去姜存氏去氏存姜及曹宋之大夫不書名不達已甚顯係斷闕宋儒不察皆目爲意義所存雖經杜孔啖趙之駁正而不悟豈不謬哉夫左氏親見國史而當其

時孔聖之經已多闕左氏不知而反為之說如澶淵之會傳据國史
本有叔孫豹會四字幽之盟公羊氏經現有公字而左氏所傳授之
本偶無之遂以為諱不書公大夫不知春秋時會盟之非義者多矣
何獨于此焉諱左氏且不知而妄生穿鑿何況後來餘子哉又

三家傳授率多闕誤兼經秦火與篆隸之變更有難于強通者如歲
首不書王者幾半夫歲首稱王一經之大頭腦也尚脫略如此況其

小者乎諸儒不知脫誤而附會穿鑿過矣楊方達補注凡例

○時闕桓四年七年昭十年定十四年閏時何賈程胡說辨
義奚闕夏字賈說辨
戊十年公羊闕時何說辨

桓四年不書秋七月冬十月

史闕文也他皆倣此杜注○孔疏見一時無事書首月門○何休

云夏書宰渠伯糾來聘下去二時者為貶天子聘也非也史闕

日月者仲尼皆不益之耳劉敞○史闕文也或謂貶天子失刑

不成議論魯桓之弑天子不能討罪惡自著何待去秋冬而後

見乎

牛子語類

○不書秋冬程子以爲天王失刑其說本於何氏休

不若杜注以爲史闕文於義爲正故劉氏敞朱子皆從之汪氏

克寬歷舉全經闕文相校以申明程子之說終無確據

案

○

說者謂賞以春夏刑以秋冬桓弑君而天討不加是有陽無陰

歲功不能成故削之四年不書以天王之下聘七年不書以穀

鄧之未朝天王與列國俱無可望矣果爾則桓十七年五月公

羊不書夏昭十年十二月三傳皆不書冬又將何說誕妄甚矣

顧棟高五禮源流口義注

○以爲弑君之賊天王及諸侯莫能討其罪故削

秋冬二時以示法然定之十四年經有秋而無冬亦將引胡氏

討賊之說曲解之乎且二百四十九年之間弑君之賊多矣而

何獨于桓削二時也

楊子庭質疑

○桓在位十八年之中元年冬十

月九年夏四月十二年春正月十三年秋七月冬十月十八年
秋七月皆以無事書首時而獨四年闕秋冬此年又闕秋冬脫
之無疑胡氏貶桓之說不可通何氏謂以火攻人君因去秋冬
以示貶更附會穿鑿此自是修後脫文胡氏從何休強生議論
徐卓經義未詳說 ○愚按此經成後闕文徐說與顧氏見程氏條下同
其說是也杜劉說尚未是

桓七年不書秋七月冬十月

杜氏以爲史闕文呂氏東萊以爲春秋以後之闕文也

家鉉翁詳說

○先儒皆謂逆亂天道歲功不成故不具四時穿鑿殊甚也使
孔子果以四年冢宰聘桓而闕秋冬則次年仍叔子復聘何以
不闕果以七年穀鄧來朝而闕秋冬當先闕于二年滕子來朝
而何以又不闕乎杜氏以爲闕文是也然謂之史闕文則不可

蓋聖人闕疑闕其事之不可知者爾若秋冬書首月以備四時
即魯史果闕聖人亦宜正之豈得仍其闕以惑世哉程學或問○
此闕文也四年杜注甚明故程胡二傳何氏休說俱不取葉集
桓十七年五月丙午及齊師戰于奚

左公闕夏字穀梁有為是

趙坦異文箋

○按春秋序正義曰桓十七

年五月無夏昭十年十二月無冬既得其月時則可知不應闕

其時獨存其月是孔子之後脫漏

又

○愚按禮記正義引賈服

說謂視朔不登臺故不書時非也

賈服云登臺不視朔書時不書月視朔不登臺書月不書

時若雖無事視朔登臺則空書時月見記疏六十一

公

莊二十六年公伐戎

左穀作春公伐戎

左穀有春字公羊疏引經文同蓋傳寫者脫去耳

趙坦異文箋

公

成十年無冬十月三字

公羊成十年經公如晉何注如晉者冬也去冬者惡公前既不
免牲今復如晉過郊乃反怨懟無事天之意當絕之按公如晉
與秋七月連文公以秋七月如晉左傳可證左穀此年又有冬
十月三字公羊偶脫耳何氏妄說謬甚孫志祖讀書錄續編○按何注
李氏廉闢其迂謬是也段氏玉裁據禮記中庸正義成丁年不
書冬十月疑古本左穀亦無此三字從賈服貶削時月之義亦
誤

昭十年十有二月甲子宋成公卒 不書冬

此年無冬脫也

孫復等王發微

○何休謂昭公取吳孟子之年故貶之

非也經無取孟子之文安得妄說此傳授誤脫也

汪克寬集疏

○何

休以爲貶昭公娶于吳賈逵服虔並云刺不登臺觀氣李氏廉
駁之是矣然謂史闕時而聖人因之無是理此修成以後脫漏

耳當從汪氏

徐卓經義未詳說

定十四年大蒐于此蒲城莒父及霄 不書冬

無冬史闕文

杜注

○蒐與城蓋皆在冬脫冬字耳

汪克育纂疏

○何休

云是年孔子以司寇攝相事齊人饋女樂孔子去不書冬者貶也此牽合之說聖人豈以去位之故而削冬時乎

家鉉翁詳說

○何

注牽强家氏辨之葉石林謂正定公之終其說益支離是時公未薨也且罪君而削天時聖人爲之乎杜注謂闕文固善然云史闕文則不可聖人闕疑闕其事之不可知者爾時月卽史有闕亦必正之豈仍其闕以惑世哉此經成後脫文也

徐卓經義未詳說參

○日月並闕

誤文見卷一另門

隱九年冬公會齊侯于防

隱十一年夏公會鄭伯于時來

公穀有五月左氏經無而正義釋文俱無說疑經文本有唐石

經以下諸本脫誤也張壽本古義

莊九年春公及齊大夫盟于莒

內會盟日月並闕以後不備載據隱六年書五月辛酉公會齊侯盟于艾隱八年書

九月辛卯公及莒人盟于浮來日月並書

隱二年紀子帛莒子盟于密

桓二年蔡侯鄭伯會于鄧

外會盟日月並闕以後不備載據隱八年書七月庚午宋公齊侯衛侯盟于瓦屋僖

九年書九月戊辰諸侯盟于葵邱日月並書

隱二年無駭帥師入極

隱七年秋公伐邾

內兵日月並闕以後不備載據隱十年書六月壬戌公敗宋師于菅辛未取郕辛巳敗

防隱十一年書七月壬午公
及齊侯鄭伯入許日月並書

隱十年秋宋人衛人入鄭

隱四年宋公陳侯蔡人衛人伐鄭

外兵日月並闕以後不備載據隱十年書十月壬午齊人鄭人入郕莊二十八年書三

月甲寅齊人伐衛日月並書

僖四年夏許男新臣卒

僖十四年冬蔡侯辟卒

外諸侯卒日月並闕以後不備載據隱三年書八月庚辰宋公和卒八年書六月

己亥蔡侯考父卒日月並書

劉氏顧氏說見日月非褒貶門蔡侯辟卒

桓五年夏葬陳桓公俞氏臯曰不書月日闕文

僖七年冬葬曹昭公

外諸侯葬日月並闕以後不備載

據隱三年書十有二月癸未葬宋穆公桓十五

年書四月己巳葬齊僖公日月並書

僖二十九年秋大雨雹

不書日月闕文也

季本私考

○按雨雹為非常之災豈有經一時皆

雨雹之理季氏以為闕文無疑

顧棟高大事表

此災異日月並闕者

據隱九年書三月癸酉大雨震電庚辰大雨雪莊七年書四月辛卯夜恒

星不見夜中星隕如雨日月並書

僖九年冬晉里克弑其君之子奚齊

文十八年莒弑其君庶其

外弑君日月並闕者餘不備載

據桓二年書王正月戊申宋督弑其君夷莊八年書

十有一月癸未齊無知弑其君諸兒日月並書

○月闕

紀姜歸京師闕月程子說辨

夏五傳疑辨

隱十一年春滕侯薛侯來朝

桓六年冬紀侯來朝

列國來朝闕書月以後不備載據成七年書夏五月曹伯來朝成十八年書八月邾

子來朝皆書月

隱七年夏齊侯使其弟年來聘

隱七年冬天王使凡伯來聘

來聘闕書月以後不備載據成三年書十有一月晉侯使荀庚來聘衛侯使孫良夫來聘

襄七年書十月衛侯使孫林父來聘並書月

隱三年秋武氏子來求購

文九年春毛伯來求金

王使至魯闕書月以後不備載據隱元年書七月天王使

桓十五年書二月天王使家父來求車並書月

桓八年冬祭公來遂逆王后于紀

僖二十九年春介葛盧來

諸侯來魯闕書月以後不備載據隱元年書十有二月祭伯來成九年書王正月紀

伯來逆叔姬之喪皆書月

桓五年秋大雩

成三年秋大雩

祭祀闕書月以後不備載據僖十一年書秋八月大雩十三年書秋九月大雩皆書月

桓九年春紀季姜歸于京師

不書歸月史失之春秋不得而益之也伊川謂書王國之事不

可用無王之月故但書時牽強不可從顧棟高引呂大圭

文四年夏逆婦姜于齊

婚禮闕書月以後不備載據桓三年書九月齊侯送姜氏于離夫人姜氏至自齊成十四

年書九月僑如以夫人婦姜氏至自齊並書月

隱五年春公觀魚于棠

隱六年春鄭人來輸平

隱七年夏城中邱

莊六年冬齊人來歸衛俘

內書事闕月以後不並載據桓四年書正月公狩于郎莊二十二年書王正月肆大眚二

十九年書十有二月城諸及防三十一年書六月齊侯來獻戎捷並書月

隱十一年至闕書正月

見卷一另門

桓十四年夏五

孔子作春秋專其筆削豈其舊史日月之闕者不隨而刊正之哉此乃後人傳之脫漏耳或云此連下鄭伯使其弟語來盟中

脫一月字

孫復尊王發微

○此修經以後之闕文

家鉉翁詳說

○當是傳經

之誤穀梁以爲孔子傳疑非也遺無故之疑豈春秋意哉

黃仲炎通

說

○穀梁曰傳疑也胡氏曰疑而不益見聖人之慎也孔子曰

吾猶及史之闕文又曰多聞闕疑慎言其餘愚謂吾猶及史之闕文謂事之不可知者爾若事之顯然可見者孔子安得不正之哉多聞闕疑孔子教人闕其理之可疑者爾若理之斷然可言者孔子亦使人疑之乎若夏五無月乃事之顯然可見理之斷然可言者也此必傳者脫遺如左氏傳成公二年夏有之比耳

程端學或問

○此斷簡也或月下別自有文而鄭語來盟自是六月事而不月或中間更有六月而鄭語蒙上月都未可知若干

夏五之下補一月字連下鄭伯爲文則非其實矣秦火而後古書錯簡脫漏者多謂夫子因舊史之闕者固非謂五爲羨文者

亦恐未必然也公羊氏云無聞蓋慎之之辭

徐卓經義未詳說

隱四年戊申衛州吁弑其君完

桓二年夏四月取郕大鼎于宋戊申納于太廟

僖二十八年冬會于溫天王狩于河陽壬申公朝于王所

成十七年庚申晉弑其君州蒲

昭二十四年丁酉杞伯郁釐卒

定十五年辛巳葬定姒

俱見有口無月門

成十七年壬申公孫嬰齊卒于狸服

見日月誤文門

○日闕

隱元年三月公及邾儀父盟于蔑

不日闕文也記史者以事繫日以日繫月其常也有不可以盡得則有時而闕焉魯史之闕春秋不能益也非義所在也葉夢得傳

隱十年春王二月公會齊侯鄭伯于中邱

內會盟不日者闕文也以後不備載

據書日者見前日月並闕條下○外

會盟不書日者或不以日告也

桓二年九月八杞

莊八年春王正月師次于郎

內兵不日者闕文也以後不備載

據書日者見前日月並闕條下○外兵

不日者或不以日告也

僖八年秋七月禘于太廟用致夫人

定八年冬從祀先公

內祭祀闕日

據閔二年書五月乙酉吉禘于莊公文二年書八月丁卯大禘于太廟並書月日

莊十六年冬十有二月邾子克卒

不日闕文也

俞奉釋義

僖七年秋七月曹伯班卒

彙纂駁季氏說見日月非喪貶門

外諸侯卒闕日餘不備載據書日者見前日月並闕條下

隱五年夏四月葬衛桓公

隱八年秋八月葬蔡宣公

外諸侯葬闕日餘不備載據書日者見前日月並闕條下

隱元年冬十有二月公子益師卒

諸說見日月非喪貶門

宣五年秋九月叔齊得臣卒

黃氏說彙纂案見日月非喪貶門

內大夫卒闕日餘不備載

據隱五年書十有二月辛巳公卒事傳十六年書三月壬申

公子季友卒並書日

文十四年九月齊公子商人弑其君舍

襄三十年夏四月蔡世子般弑其君固

外弑君闕日餘不備載

據書日者見前日月並闕條下

○日月下闕事

桓五年正月甲戌已丑三傳設辨年夏五月何說辨

莊二十二

桓五年春正月甲戌已丑陳侯鮑卒

甲戌首年十二月二十一日已丑此年正月六日

杜注

○公穀皆

云甲戌之日出而亡已丑之日死而得按國君雖狂而去亦當

有臣子從之豈有國君走出臣下不追逐味其死日乎

陸道辨疑引映

助 ○左云再赴豈有當禍亂時而頻競赴告哉傳云公疾而難

作驗此則經文甲戌下當記陳佗作亂之事脫簡耳

又引趙匡 ○春

秋之經自相照驗未有始終不相合者若明年但書殺陳佗而今年不載陳亂之迹則陳佗者何人而殺之又以何罪本此而推甲戌下載陳佗之事趙子說是孫覺經解○左曰再赴公羊曰君子疑焉穀梁曰舉二日以包之皆不究闕文之義李康會通○劉氏做謂甲戌下當有陳侯之弟佗殺陳世子免十字程氏端學亦謂經有書弑君而賊不討者未有討賊而不書弑君者使魯史但有蔡人殺陳佗之事而不見陳佗弑君事天子將并殺陳佗不錄必不傳疑于後此必筆削以後之闕文顧棟高闕文篇○甲戌之下脫簡耳左謂再赴無此理公穀謂不知死日舉二日以包亦非也君卒以日告必知其日豈有憤憤以二日告者徐庭恒管窺

莊二十二年夏五月

四時無事書首月此書夏五月經闕繆

杜預釋例

○未有以五月首

時者月下脫事爾孫復尊王發微○何休謂譏公娶讎女不可奉先猶

五月不宜首時此因下文盟防為謀昏始事故生穿鑿顧棟高大事表

成元年冬十月

穀梁傳載行父與晉卻克衛孫良夫曹公子手同時聘齊事范

注穀梁子作傳皆釋經立義未有無其文而橫發傳者疑冬十

月下脫季孫行父如齊六字

○日食闕書日朔凡十公羊以為失之前後穀梁以為晦夜食辨

隱三年春王二月己巳日有食之

不書朔史失之杜注○公羊謂日不日或失之前或失之後非也

日月有詳略皆史文也劉敞權衡○日食不書朔者八左氏曰官失

之也公羊曰二日也穀梁曰晦也唐人以歷追之俱得朔日則

左氏之說長矣鄭樵六經奧論○或日或不日或朔或不朔皆史闕文

襄十五年以後無不書朔日者

顧棟高大事表

桓十七年冬十月朔日有食之

左氏曰不書日官失之也

杜注日官日御典歷數者

非也史闕之耳何關日

官日御乎

陸清辨疑引趙匡

○自文以上日食有不書日者自文以下

皆書日故曰桓莊之世多闕文

陳傅良後傳

莊十八年春王三月日有食之

不書朔與日脫也

孔疏

○日朔俱失之

孫復尋王發微

○穀梁曰不言朔

夜食也非也春秋闕疑據見而錄何以知其夜食而書乎

劉敞權衡

僖十一年春王三月庚午日有食之

僖十五年夏五月日有食之

日朔不書俱失也

趙鵬飛經筵

文元年二月癸亥日有食之

公羊有朔字左穀無或闕文

趙坦春秋異文箋

宣八年秋七月甲子日有食之既

杜氏長歷以七月甲子爲三十日則是晦食非也長歷又云十

月甲子朔余因悟春秋經秋七月三字乃書之以備一時下經

冬十月三字合在此甲子之上不書朔者史闕文本是錯簡杜

氏誤解之爾

梁履繩補釋

宣十年夏四月丙辰日有食之

宣十七年六月癸卯日有食之

襄十五年秋八月丁巳日有食之

○一日兩事重書日羨文

穀梁說辨

桓十二年冬十有一月丙戌公會鄭伯盟于武父丙戌衛侯晉卒

再言丙戌羨文也

孫復尊王發微

○丙戌之日再見於經者誤文耳穀

梁謂之決日葬也

孫覺經解

○王不稱天凡三

程明說辨

莊元年冬王使榮叔來錫桓公命

文五年春王正月王使榮叔歸舍且賜三月王使召伯來會葬

皆闕文見書天王門若桓五年從王伐鄭僖二十八年兩書公朝于王所乃省文而非闕也

○桓凡十四年不書王

公穀程杜諸說辨

舊說穀梁傳曰元年春王桓無王其曰王何也謹始也元年有王所以

治桓也二年曰王何也正與夷之卒也十年曰王何也正終生之

卒也十八年書王未發傳

范註此年書王以王法終治桓之事

○何休公羊注曰不

書王者見桓公無王而行也二年有王者見始也十年有王者數

之終也十八年有王者桓公之終也

見桓三年

○程子曰桓弑君而立

元年春王以王法正其罪也二年宋督弑君書王亦以王法正其罪也三年不書王見桓之無王也。孫氏復曰十年十八年書王者王無十年不書也十年無王人道滅矣。家氏鉉翁曰桓書王者四年不書王者十四年書王明王法也不書王著桓無王與桓不能以王法正天下也元年書王以王法正其罪也二年書王憤魯誅之未及而宋亂又作也至三年王朝不聞有誅殛之命而宰渠伯糾又下聘焉王法掃地矣自是不書王者七年至十年又書王則以天道一周至十八年桓見殺於齊乃復書王正月言王誅雖不加而天理未嘗泯其死於齊是亦討也

按家氏說卽申明程子孫氏之義

駁桓在位十八年凡十四年不書王先儒之說大抵皆祖穀梁元年書王胡氏謂以天道王法正桓公之罪二年書王正華督之罪十年書王謂天數之終十八年書王謂正桓公之終其立說可謂鑿

矣呂氏大圭曰春秋書王本以律天下之不王豈因桓之不王而遂自去其王乎果以桓無王而不書王則當始末盡然又奚以元年二年十年末年復各書王且桓宣皆弑逆皆天討不加而宣何以書王乎程氏端學曰此爲闕文無疑聖人豈屑屑去一字以示褒貶使後世揣摩臆度此必傳寫之誤而後世不敢增益之亦如夏五閔月之類耳顧棟高闕文表又五禮源流口號注○以不討賊削王則春秋之王當削者多矣不爲他國不書王而獨爲魯貶其王豈王獨繫於魯而不繫他國乎郝懿行說略莊三十二年○月繫王奉正朔之義國史之體皆然何可意爲去留哉謂桓爲無王則元年乃卽位之始何以反存之邪謂元年及十八年爲桓終始之年則二年十年何以亦存之邪而桓宣同罪又何以一去一留邪其爲修後脫文無疑高澍然釋

經桓

三年

杜云首時必書王明此歷天王所頒其或廢法違常失不頒歷則不書王劉炫曰天王失不頒歷乃大事何得傳無異文襄二十七年再失閏杜云魯之司歷頓置兩閏哀十三年十二月蝓仲尼云司歷過杜云季孫聞仲尼之言而不正如杜所注歷既天王所頒魯人何得擅改杜此言自相矛盾此不書王是闕文耳

桓三年孔疏

○夫人姓氏闕文誤文

三傳賈孫諸說辨

莊元年夫人孫于齊

不稱姜氏蒙上文也春秋一事再見者蒙上文

趙仿集傳

○不稱姜

氏三傳皆以爲貶吳氏激程氏端學以爲闕文愚謂此是省文爾若以爲貶文姜則哀姜又何以書夫人姜氏孫于邾乎或曰文姜殺夫哀姜殺子罪有輕重夫殺夫殺子俱是弑君恐不得分輕重夫君弑夫人奔直書于策而罪狀顯然已具不須更去

氏以示貶也此因上桓十八年公與夫人姜氏遂如齊以後一
年之中但書桓公見弑一事中無異事但書夫人而即可知其
爲文姜承上文之辭耳不必曲爲之說也齊氏履謙亦謂一事
再見故從省顧棟高大事表○承上公與夫人姜氏如齊故不再著姜
氏也閔二年夫人姜氏孫于邾上無所承不得不著姜氏說者
謂殺夫罪重故去姓殺子罪輕故不去姓此何理也陳祖范經咫
僖元年夫人氏之喪至自齊

不稱姜闕文

杜注

○齊治哀姜之罪取而殺之則位絕於魯非復

魯之夫人其薨葬不合書之於策以僖公請而葬之存母子不
絕之義故具書於經薨葬備禮諱之若無罪而自薨既諱其殺
不宜有貶而公羊曰貶不稱姜氏與弑公也穀梁曰不言姜以
其殺二子貶之也賈逵云殺子輕故但貶姜夫姜氏者夫人之

姓二字共爲一義不得去姜存氏去氏存姜若其必有所貶自可替其尊號去一姜字復何所明且於墓葬無貶何故喪至獨去一姜公羊又云貶必於其重者莫重乎其以喪至也案禮之成否在墓葬何以喪至獨重喪至已加貶責於葬不應備文何故葬我小君復得成禮故杜直斷以闕文公穀殆妄爲之說耳

孔疏○脫姜字爾若果去氏何不於薨于夷去之

俞泉釋義引吳氏

○春

秋書葬哀姜稱小君則上文夫人氏是偶闕而以爲貶削過矣

黃仲炎通說

○孫氏復以爲貶又云孫子邾不貶者不以子討母也

此而貶者正王法也蓋從公穀謬說

顧棟高大事表

○夫人

氏者闕文也公羊以爲貶非也哀姜之惡不甚於文姜文姜不去姓何獨於哀姜去之且不貶於孫邾之日而貶於喪至之日非法矣書薨于夷書以歸書喪至則哀姜之不容於宗國足以

彰其惡矣欲加以討罪之辭削其夫人可矣於姓乎何尤殺梁
曰爲齊諱殺同姓也管蔡叛而周公行誅何諱焉胡氏曰不稱
姓殺於齊不去氏受於魯亦曲爲之辭也王介之四傳質○不書姜者
史闕也三傳皆以爲不言姜與弑二君也旣以弑二君而去其
姓則前此當弑之時何以不去其姜也故曰史闕也徐學謨春秋傳
文四年夏逆婦姜于齊

不書氏不書夫人脫簡也此條自夏字以下安闕文

俞事釋義○二

傳以姜之去氏爲貶杜氏以爲闕文按婦而言姜加氏則辭繁

亦猶文姜成風以諡稱則不以氏稱也非貶之也

程端學三傳辨疑○

凡夫人加氏字便於言爾今旣曰婦姜故不必言氏無他義也

陸高辨疑引啖助○按程顧氏駁穀梁說見昏禮門

宣元年遂以夫人婦姜至自齊

不書氏史闕文

杜注

○公穀以不稱氏為貶喪娶喪娶當罪其父

母何乃貶責夫人且去氏稱姜不成文義知為史闕也孔疏○以

去氏為貶非也一國之母非臣子所當貶

郝懿行說

公羊

襄四年夫人弋氏薨葬我小君定弋

弋左作姒

穀梁

定十五年弋氏卒葬定弋

弋左作姒

王趙說見書夫人薨葬門襄四○襄哀妾母不應並稱定姒喪

四年姒字誤當從公羊作弋

朱陸擇辨疑

附 內女繫國闕文

穀襄三十年叔弓如宋葬共姬

穀梁脫宋字

趙坦異文箋

○上有如宋二字則下宋字疑衍

洪亮吉春秋詁

○外諸侯爵號名謚闕文誤文衍文 公會外盟闕文

紀子伯杜穀程趙說辨

何啖說辨

盟幽盟翟泉程胡說辨

賁來三傳程胡說辨

齊人伐山戎齊侯獻

葬蔡桓侯

戎捷二傳說辨 郭公二傳說辨 外諸侯卒闕各左氏說辨 諸侯出奔闕各舊說辨

隱二年紀子伯莒子盟于密

杜注子帛卽裂繻字

是年秋紀裂繻來逆女

果爾則春秋前書名後書字

何所區別於其間邪其餘諸說不同皆無可考闕疑可也

發達

義

○以子帛爲履繻字紀大夫無先莒子理又載書大夫登名

亦無稱字理以子伯爲侯字之誤者近之

姜寶事義全考

○穀梁日記

子伯莒子而與之盟范注伯長也推莒子爲伯穿鑿可笑左氏

作帛以子帛爲裂繻字曰魯故也杜注因增出平莒魯之怨事

不見經傳况通經無大夫先諸侯之例亦附會不通公羊以帛

字作伯字而不能傳但曰無聞焉爾程子本公羊以爲當云紀

子某伯莒子然紀侯爵非子爵恐子字上尚有闕字吳氏徵曰

子伯二字或是侯字之誤

顧棟高三傳異同篇參

○桓二年紀侯來朝紀

本是侯爵緣隱二年書紀子伯莒子盟于密何休註公羊遂謂
紀本是子爵因天子將娶於紀故封之百里以廣孝敬穀梁註
亦謂時王所進爵由是後世遂啟光寵外家之漸班固外戚恩
澤侯表序又云后父據春秋襄紀之義應劭云王者不娶於小
國天子將納后於紀先襄子爵爲侯漢世立后先進其父爲大
司馬大將軍封邑侯恩澤之濫自此始則皆不知紀子伯之爲
闕文而誤創襄紀之說誤之也顧棟高五經原流口說注○公羊傳云無聞

猶云未詳亦不信左氏故愼之也穀梁說頗穿鑿左氏以子帛
爲裂繻字杜氏因增出平莒魯之怨然事不見經趙氏以莒人
入向無駭帥師入極附會左氏益生支節惟吳氏澄疑侯字離
文爲子伯當從之此必紀侯莒子無疑蓋紀迫于齊而睦于莒
故相盟也徐卓經義未解說○愚按左氏之不可通誠如顧說所駁穀

梁有二說一以伯字連下讀曰紀子紀君也作者長也伯莒子者盟時推莒君爲長一以伯字連上讀曰紀君長于莒君而爲盟無論列長次于文中春秋無此文法且以紀爲子爵直不知曾有紀侯書于經舛謬甚矣啖氏曰闕文耳是也

隱七年春滕侯卒

不名史闕也

程子經說

○諸說見外諸侯卒門

隱八年夏宿男卒

不名闕文也元年及宋人盟而穀梁以爲未同盟不名誤矣

前

釋義

○諸侯死則稱名乃策書常體蓋不名則其世無所別矣故

凡不書名者皆闕文也

李本私考

○凡不書名諸儒以爲史失之是

也胡傳謂赴不以名書名者是聖人筆之無據

葉集案

桓六年寔來

闕文也三傳謂是州公以上承五年冬州公如曹下無異事言

之耳然極考其說皆未安其間文有脫漏也孫復尊王發微○張氏之

說未可從是來在州公如曹之下文猶未暢豈有相隔一年而

但曰是來恐史氏立言聖人作經不如是之晦也程端學或問○張

氏治以寔字為虛字極為弄巧孫氏師氏以為闕文若晦黃氏

亦謂當如郭公之類簡編脫誤方氏苞亦曰如左氏之說則當

書遂來奔或州公自曹來奔如鄭詹自齊逃來之例可也宋華

元出奔晉宋華元自晉歸于宋事以連及尚其舉其名况事不

相屬時年已隔而徑省其文使辭旨不可別白乎此經文有闕

傳者傳會而為之說也顧棟尚三傳異同篇○闕文也杜預訓寔為實公

穀訓寔為是謂之是者簡言之也非也書來者當目其人簡其

人而沒其名謂之是而已非辭也程子胡氏訓寔為名以為諸

侯失地名非也失地當以名繫國不當以名沒國也

郝懿行說

○

謂寔爲州公名非也名則當繫於州公之下不繫國與爵而突書其名安見其爲某人也程子謂不能反國則匹夫也故名之

夫諸侯失國皆書國與曾無竟書名者在他國亦爲寓公諸侯

不臣寓公豈遂賤視爲匹夫邪

徐應垣管窺

○寔來蓋闕文也公羊

云是人來也於文不順胡氏云寔者州公名則沒其爵而獨舉

其名亦春秋所未有皆所謂求爲之說而鑿者也

王介之四傳質

○若

上書州公如曹之下卽書寔來則是州公也今州公如曹在五

年之冬寔來在六年之春經隔一年安可謂承上文書寔來也

春秋之文決不如是晦昧也或又謂寔州公名去年如曹未失

國故不名今來魯不復其國故名之使果州公也於去年如曹

宜以失國之例書曰州公寔如曹則今年寔來乃州公也去年

不書其名今年不書其國安知寔之爲州公乎蓋闕文也

鄭王闕疑

公桓十四年 宋人以齊人衛人蔡人陳人伐鄭

衛在蔡上誤見序諸侯升降門趙說

桓十七年葬蔡桓侯

稱侯蓋謬誤

杜注

○五等諸侯卒從其爵葬皆稱公蓋葬者鄰國

與臣子之義也稱公非僭也周公太公之後皆侯爵耳故曰齊

侯魯侯爵也而太公之子孫曰丁公曰乙公曰癸公周公之子

孫曰考公曰煬公曰幽公皆成康之盛世亦可謂之僭乎則諸

侯葬稱公者禮也今蔡桓侯葬而書侯修經之後傳寫謬耳蓋

前乎此宜公葬書公後乎此平公葬亦書公何獨於桓侯而不

以公配之哉

趙鵬飛經筵

○啖氏助謂蔡季賢爲其兄請諡于王故

稱侯胡傳亦從其說趙氏鵬飛駁之曰諸侯葬皆稱公此蓋修

經之後傳寫誤也。啖說鑿矣。按何氏休以桓有賢弟不能任用反疾害之而立獻舞國幾亡故抑桓稱侯。啖氏不用而更創為請諡之說所謂能知他人之鑿而不自知其鑿者也。顧棟高大事表

桓十五年公會宋公衛侯陳侯于袤伐鄭

公羊經多齊侯二字按古本左氏經亦當有齊侯字觀說文所

引可證

趙鼎異文箋○說文移字注春秋傳公會齊侯于袤

○說文所云春秋傳皆左氏

傳據所引疑今本左氏有脫文然此是經而說文云傳亦屬可疑且納厲公是宋意非齊意故下十六年會于曹及伐鄭齊皆不與此會殆無齊侯歟。張壽蓁古義

穀梁

莊十三年春齊人宋人陳人邾人會于北杏

穀梁曰是齊侯宋公也其曰人何也疑桓非受命之伯也案此九合之一不當貶穀梁譌齊侯為齊人遂從而為之辭。趙鼎異文箋

莊十六年會齊侯

等八國諸侯

同盟于幽

公羊有公字

此左氏經闕文當從公羊有公字

有履謙統紀

○趙氏以此爲諱與

讐會不書公則莊與齊桓不可謂讐盟柯不諱此何諱焉胡氏

以爲諱魯叛盟則齊執鄭詹先自失信何尤於魯而春秋預爲

諱之當從公羊作公會

朱朝瑛畧記

○陸氏消孫氏復皆以爲不言

公者諱之也按此當是闕文經固有前不書以示義而後此皆

從同者未有前後從同而中間沒不書以爲諱者也杜注又曰

不書人微者亦非也齊桓始伯魯小國豈敢以微者與齊侯會

八國皆君親臨而魯獨遣微者此事理情勢必不然者且前後

盟會皆公親蒞獨於此同盟之始使微者攝之何邪況公羊有

公字此非闕文而何

顧棟高大事表

○無公字當是脫文左氏無曹伯

二字亦脫漏

趙思異

○伊川文定謂惡公之叛盟失信而諱之

春秋於魯惡未有諱者何諱於叛盟且未有叛盟在後而諱之

於前者

齊伐魯在十九年

左氏脫文耳

張自超宗朱辨義葉西羌道泰

惠棟云左穀無公字故穀梁傳不言公按公會二字當為衍文

據十九年何注云鄆幽之會公比不至公子結出竟遭齊宋謀

伐魯故矯君命與之盟然則非特魯君不至即大夫亦未來會

與十五年鄆之會同春秋繁露云幽之會莊公不往

阮元公羊傳校勘記

莊二十四年郭公

經闕誤也

杜注

○公穀連上赤歸于曹為句以赤為郭公名按郭

公自是闕文亦乃曹公子文義都不相關傳誤甚矣

陸道辨疑引趙匡

○公穀曰郭公赤也失國而歸于曹也使郭公失國而歸曹將

書曰郭公赤出奔曹先書赤歸于曹而繼之以郭公非辭也

蘇轍

集解

○以赤為郭公名何以不曰郭公赤歸于曹以見其為國君

外歸而乃顛倒其辭迷錯若此劉敞權衡○上下有闕誤或曰郭亡

亦強通之也當傳疑鄭玉闕疑○汪氏謂亡字从人从乚與公字相

近然公字篆文與亡字迥異不可強通王夫之稗疏○歷攷經傳號

通作郭號之後氏郭是郭公即號公然東號亡於春秋之前西

號亡於僖之五年此時安得有號亡之事或據齊桓問郭何以

亡一事改郭公為郭亡但郭公之見於春秋其事不可得知必

求其事以實之則鑿矣劉履恂秋槎雜記引汪喜林說○洪氏亮吉亦疑為號

公見土地各門郭國

莊三十年冬齊人伐山戎 三十一年夏齊侯來獻戎捷

趙子曰二傳不知誤文之義妄為穿鑿二傳皆言齊侯親伐左

氏僖九年傳宰孔曰齊侯北伐山戎南伐楚足證是齊侯親行

也伐山戎當書齊侯獻捷當書齊人文誤耳據齊未伯之時尚

也伐山戎當書齊侯獻捷當書齊人文誤耳據齊未伯之時尚

不會朝魯今爲伯主豈有自獻捷乎

陸渚集傳辨疑

○經文上下兩訛

也諸侯有四夷之功親獻捷于王北面陳俘戎服將事今齊大

國霸主其來陳俘而魯君受之乎於禮多窒故疑文誤

徐庭垣管類

莊三十一年夏薛伯卒

公僖八年公會王人齊侯宋公衛侯許男曹伯陳世子欸鄭世子

華盟于洮

案此經下卽書鄭伯乞盟則鄭世子華不會盟可知公羊衍此

四字

趙坦異文箋

○左穀經文皆曰公會王人齊侯宋公衛侯許男

曹伯陳世子欸而不及鄭惟公羊有鄭世子華以經考之鄭伯

自逃首止之盟明年諸侯圍新城以討之又明年諸侯盟甯母

而鄭世子華在焉蓋鄭畏討而以世子會鄭伯身猶未至故明

年又爲洮之會始懼而乞盟經文當如左穀

葉夢得公羊傳

公羊僖十九年宋人曹人邾婁人盟于曹南

公羊作宋人或字之譌何注欲同於微者稱人例遂援季姬事

以實之謂為宋襄諱未足信趙坦吳文箋

僖十九年會陳人蔡人楚人鄭人盟于齊公羊有公字

顧氏以為闕文見下翟泉○按郝氏兩趙氏說以為魯非卿會

故不目其人甚有理則未必是闕文也見春秋之初卿大夫稱

人門○四國稱人則不當公會疑公羊衍公字張壽恭古義○按此說亦通

又邾人執鄆子用之

鄆杞皆魯昏姻而不名並修後之闕高樹然釋經

又冬梁亡

紀於歲終是史失其所以亡之故時月皆不可紀也張自超宗朱辨義

僖二十三年冬杞子卒

杞與魯婚而成公卒不書名闕文也

江克貢纂疏

○高說見上

僖二十四年冬晉侯夷吾卒

左傳惠公二十三年九月卒而經在明年之冬杜氏謂晉文定位而後告惠公之喪經文從赴程氏端學謂惠公卒時非有內亂外伐安得不告喪必待文公至乃告邪僭使文入而告必以卒之年月必不書其赴到之日也余謂四字當是三字之誤乃漢晉以來傳寫之訛爲杜氏傳會而誤也不然魯史自晉文入國至創伯五年中無書一晉事者豈有獨書一夷吾卒之理晉文豈有告喪而不告已之入者邪

顧棟高大事表

僖二十五年衛侯燬滅邢

諸說見滅同姓名駁辨

穀梁僖二十八年冬公會晉侯宋公蔡侯鄭伯陳子莒子邾子秦人

于溫

穀梁無齊侯二字或脫文趙坦異文箋

僖二十九年會王人晉人等盟于翟泉公穀皆有公字

秦齊之盟公羊有公字翟泉之盟公穀俱有公字左氏偶闕耳不必以諱生義也且以諱公而外稱人遂以為貶則如桓二年書公會齊侯陳侯鄭伯于稷以成宋亂又何為不諱公而爵諸侯乎胡傳更護之曰書成宋亂則其責已明不必諱公貶諸侯然後見其罪則春秋於桓既書公矣又加一斷語於僖則併沒公不書何寬於僖而刻於桓借曰僖賢而桓賊而當日諸侯之罪又因桓僖二君之賢召以為書爵書人之重輕聖人之好惡不應用心屈曲如此顧棟高大事表○左氏傳云公會並不言不書公諱公與盟則左氏經富有公字無者脫漏耳杜注鑿趙坦春秋異文箋

經文陳人下有蔡人而傳無名字注云卽微者夫微者不書乃

經例傳則豈以非卿略之恐傳有闕文杜強爲說耳朱鶴齡讀左日鈔

公文八年公子遂會伊雒戎盟于暴左穀作雒戎

趙說見土地門雒戎

文十二年邾伯來奔

不名史闕之程端學本義○餘見失地名不名門

公文十三年公如晉衛侯會于沓左穀作會公于沓

秦公羊脫公字趙世異文箋

宣九年秋滕子卒

成十四年冬秦伯卒

不名闕之程端學本義

成十六年夏滕子卒

滕同伐秦而滕子卒不名是史失之

江克寬纂疏

襄十四年衛侯出奔齊

公羊有衍字

不名左穀闕文當從公羊有衍字或曰剽得位非正不以兩君之辭與之是不然春秋諸侯援立不得其正者非獨剽也何嘗不以兩君之辭與之凡奔而名者皆以別二君也惟衛鄭奔不以名見蓋叔武不取於為君而攝之曹負芻歸不以名見蓋子臧不取於為君而逃之則內無君而不嫌爾吾故知其為闕文而辨其正不正義不在是也

葉夢得傳

○宜從公羊葉說是也

趙悅西大事表

襄二十二年公會晉侯齊侯宋公衛侯鄭伯曹伯莒子邾子薛伯杞伯小邾子于沙隨

公穀邾子下有滕子左氏無闕文也

趙坦異文箋○陳樹華攷正同

公昭元年莒展山奔吳

二傳脫與字趙坦異文箋

昭五年秋蔡伯卒

史失其名非貶也家鉉翁詳說○不名者史書之略耳公羊以爲匿

嫡之名非也湛若水正傳

昭十一年夏楚子虔誘蔡侯般殺之于申

按虔字衍文見相殺名駁辨門

昭二十一年冬蔡侯朱出奔楚二十三年夏蔡侯東國卒于楚

穀梁朱作東傳曰東者東國也○前書蔡侯朱出奔楚而後書

蔡侯東國卒于楚穀梁以朱爲東疑是而又脫一國字耳蓋朱

無歸入卒葬之文而東國無出奔之事疑只是一事呂大圭或問○

傳謂貶東國而去其二名按諸侯出奔而名所以別二君未有

反去其名之半以疑後世者葉夢得穀梁傳○按左氏公羊皆以朱

與東國爲兩人汪氏克寬又引史記蔡世家

云東國攻平而辨侯子而自立

穀梁之說爲非然考史記世家無蔡侯朱年表于昭二十一年

云蔡侯東國奔楚與穀梁胎合則朱卽東國無疑矣況出奔與

卒不及兩年若係兩人則必朱訴于楚楚拘東國而東國復卒

于楚何以朱被逐之君而不書其卒東國篡國之賊而不志其

奔聖人係所見之世立文不宜如此之脫落無次序也其爲闕

誤無疑

顧棟高大事表

○按程公說分紀以朱爲平公子東國爲平公

弟謂必二子爭國朱不勝而奔訴於楚楚拘東國也當以顧說

正之○

又按高氏澍然據奔君例不書卒以爲兩人論亦可據見外諸侯卒門如其說或史記承穀梁之誤歟

定九年秋秦伯卒

不名闕文

俞皐釋義

公定十二年冬公會晉侯盟于黃

齊侯誤作晉侯當從左穀

趙坦異文箋

穀定十三年齊侯次于垂葭

穀梁脫衛侯二字

趙坦異文箋

哀三年冬秦伯卒

○公如衍文闕文

公桓十八年公會齊侯于濼公夫人姜氏遂如齊

公羊脫與字耳傳者據以爲解謂何以不言及夫人外也誤也

趙坦異文箋

昭二十三年冬公如晉至河有疾乃復

公羊作公有疾衍下公字何注曲爲之解非也

趙坦異文箋

○王子王臣誤文

左隱三年尹氏卒誤君氏

辨說見凶禮門附夫人薨葬後

宣十四年王札子殺召伯毛伯

王札子王子札也蓋經文倒札字杜注

穀梁文五年葬我小君成風王使毛伯來會葬

左公作召伯穀梁誤趙坦異文箋

○內大夫闕名衍文仲孫忌公羊說辨

穀梁僖三年冬公子季友如齊涖盟

穀梁衍一季字趙坦異文箋

文十四年叔彭生帥師伐邾

此叔仲彭生也脫一仲字耳季本私考○十一年承筐之會稱叔仲

彭生此文闕也方苞通論○三傳並闕仲字則知修後有闕文也而

仲孫湫闕湫陽處父闕陽可知矣高澍然釋經

公羊昭二十四年叔孫舍至自晉

公羊叔孫二字或衍文

趙世異文箋

○顧氏毛氏說見一事再見卒

名不氏門

定六年季孫斯仲孫忌帥師圍郕

何忌不言何闕文

杜注

○公羊以為譏二名妄矣列國君大夫二

名者多矣何獨於此譏

黃仲炎通說

○孫氏復曰前曰仲孫何忌後

曰仲孫忌傳寫脫也據此則為筆削後之闕文顯然易見何忌

現為大夫魯史何至逸其一名即使魯史有闕孔子亦宜正之

豈亦有疑而未敢增益乎此與哀十三年晉魏曼多書曰魏多

者同為闕字而公羊便謂春秋譏二名何休便謂二名難諱孔

子欲存臣子之敬收古禮為後世之法甚矣其誣也且即公羊

春秋其前後皆稱何忌獨此一處少何字便為此說又何以解

前後之經文

顧棟高大事表

○公羊說甚鑿春秋人臣二名多矣聖人

喪貶豈在名之一字二字亦斷無一書再書之後復去一字以

示譏者

洪亮吉春秋詁

○以為譏去何字考昭三十二年定三年六年

十二年哀元年二年五年六年經文凡十二書仲孫何忌何以

不去何字左公穀皆同公羊譏二名之說鑿何氏難諱之說更

非劉氏又以忌與何忌二名者更名也亦臆說

徐卓經義未詳說康樹華攷正參

○外大夫問名闕國名衍文誤文

黑肱闕書邦公穀說辨

魏

閔元年冬齊仲孫來

不名闕也與叔彭生仲孫忌同

高澍然釋經

文二年春及晉處父盟

處父不氏闕也

高澍然釋經

宣十年夏齊崔氏出奔衛

高氏疑氏爲天字之譌見世卿門

襄二十九年仲孫羯會晉荀盈齊高止朱華定衛世叔儀鄭公孫段曹人莒人滕人薛人小邾人城杞

左氏經莒人下脫邾人二字公穀有

趙川異文箋○陳樹華攷正同

公昭元年衛石惡會虢

左穀作齊惡

衛齊惡左傳稱齊子而公羊經作石惡按經文石惡已於襄二

十八年出奔晉矣此傳寫之誤耳

趙坦異文箋

公昭十年晉欒施來奔

左穀作齊

毛氏說見大夫書氏門齊欒氏

昭三十一年黑肱以濫來奔

黑肱邾大夫不書邾史闕文公穀亦以濫爲邾邑而傳解其無

邾之意言邾人以濫封黑肱使爲別國故不繫於邾妄說也

杜注

孔○公羊文何以無邾婁通濫也曷為通濫賢者子孫宜有地
疏○也賢者孰謂叔術也何賢乎讓國也何注通濫為國故使
無所繫叔術邾婁公之弟○穀梁不言邾黑肱別乎邾也其
不言濫子何也非天子所封也范注邾以濫邑封黑肱故別之

若○傳云邾黑肱而經不繫邾闕文耳以為通濫為國以為別

乎邾皆妄說也齊楚大國且未嘗分其地以封子弟况蕞爾之

邾乎或又謂濫乃天子之地黑肱乃天子之命吏尤為臆說夫

王吏守土則得自專其地矣何為奔于諸侯邪汪克寬纂疏○黑肱

不係邾公穀言邾人以濫封黑肱使為別國故不係于邾陳岳

氏曰春秋凡書外大夫來奔未有不言國者外大夫以地來奔

亦未有不係于國者此明是闕文二傳妄也程端學三傳疑○公羊

謂叔術賢而讓國又謂其殺仇妻嫂夫叔術果讓國邾必無傷

倫之事如其有也雖讓國豈賢之乎黃元作南莊類稿○穀梁以為別

封則固已有國世安有挈國而奔者哉趙鵬飛經義○按傳明言邾

黑肱則左氏時經文邾字尚未闕

趙佑案

○若非闕文則不成辭

穀梁固非公羊通濫之說尤害義

高南溪釋經
郝懿行說畧

昭三十二年仲孫何忌會晉韓不信齊高張宋仲幾衛世叔申鄭

國參曹人莒人薛人杞人小邾人城成周

左氏莒人下脫邾人二字公穀有

趙坦異文箋
陳樹華改正

附辨正顧氏一條

顧氏棟高曰襄三十年晉人等會于澶淵左傳云不書魯大夫
諱之也愚謂此亦晉人之上闕叔孫豹會四字耳若以爲諱則
魯會諸侯之非義者多矣桓二年會稷僖二十八年盟宋成二
年會蜀黨逆助亂背華卽夷絕不一諱而獨於此諱乎以是知
爲闕文也愚按史文內會外之詞書會某于某會字在上外相
會之詞書某某會于某會字在下惟殊會乃有兩會字此非殊

會而會字在下內卿不與會也方氏苞高氏澍然謂魯大夫不

會是也見大夫書人門本非闕文顧氏似誤

左穀定四年蔡公孫姓歸姓帥師滅沈

趙說見書公孫門

羊公定八年晉趙鞅帥師侵鄭遂侵衛

左穀作士鞅公羊傳譌也趙坦異文箋

穀公定十年宋公之弟辰暨宋仲佗石彊出奔陳

公穀仲佗上行宋字何注曲爲之說非也趙坦異文箋○何云復出宋者惡仲佗欲

帥國人去

羊公定十四年春楚公子結陳公子佗人帥師滅頓

公孫佗人作公子與左穀異

穀公定十四年春晉趙陽出奔宋

按衛趙陽左氏傳既有明文正義引世本又足據當以左氏經文爲正公穀作晉趙陽公羊釋文又作晉趙鞅似因十三年有鞅叛之文而誤也

趙坦異文錢

公羊哀十三年晉魏多帥師侵衛

公羊譏二名謂二字作名若魏曼多也按文武賢臣有散直生

蘇忿生則公羊說非也

曲禮正義引五經異義

○左氏春秋作魏曼多公

羊春秋闕一曼字據此足見後人傳授之誤左氏所傳偶不闕

而公羊所傳偶闕耳公羊傳曰曷爲謂之魏多譏二名非也

高大事表○又詳見前條仲孫忌

附成十五年秋宋華元出奔晉宋華元自晉歸于宋宋殺其大夫

山宋魚石出奔楚

徐仲山日記云此經有五疑華元未奔晉曰奔晉一疑不自晉

歸曰晉歸二疑蕩澤去氏而稱字子邪否邪三疑五大夫同奔

止書其一四疑書例多省文兩宋華元五朱字五疑此必簡牘

有脫誤

毛奇齡傳

○執諸侯衍文

公成十五年晉侯執曹伯歸之于京師

左穀作歸于

趙說見執書歸于門

○殺大夫闕名

公羊傳曹宋二說辨左杜陳氏說辨

穀梁傳曹宋二說辨

莊二十六年曹殺其大夫

不書名脫之

孫復尊王發微

○公羊曰衆也非也三郤亦衆何以名之

杜預曰無罪也非也殺大夫多矣曹宋不名其餘皆名豈盡有罪也陳君舉謂曹赤篡弒大夫有不義其君者不名以惡君也果爾則被殺者忠臣當特書名以表其忠何爲反沒之華老云

舊史失其名亦恐未然若魯史本無名氏則斷爛之文聖人宜并削之何爲留疑於後世乎此蓋孔子修成以後之闕文行說也

魯顯棟高刑賞表闕文表參

○孫劉說見書殺門穀梁謂曹無命大夫劉氏

辨之趙氏辨左說見書殺大夫門文七年

僖二十五年宋殺其大夫

不名闕文也

俞卓釋義

○劉氏辨公穀說見書殺門杜氏從文七年

左義謂無罪故不名亦非另有辨○大夫無名闕文此與莊二

十六年曹殺其大夫闕文例同公羊謂宋三世內娶故三世無

大夫

謂宋公三世皆娶大夫女故不敢臣婦父也

則未聞君不臣婦父者周武王未

嘗不臣齊尚父也若穀梁謂所殺者孔氏故孔子諱之則桓二

年宋督殺大夫孔父顯見乎經而敢爲是說妄矣

毛奇齡傳

文七年宋人殺其大夫

辨左公說見書殺門

成十五年宋殺其大夫山

說見辨不書氏門

○兵事闕文衍文誤文

昇宋人闕弼字說辨 敗秦公羊說辨 致陳宋闕宋胡傳說辨

莊九年及齊師戰于乾時我師敗績

內不言敗此言我師敗績羨文益後人傳授誤增耳

孫復尊 王發敬

穀莊二十年齊人伐我

左公伐戎是也穀作伐我以戎我字類而譌

趙坦異 文箋

莊三十年夏次于成

案左氏莊三年傳凡師一宿爲舍再宿爲信過信爲次則次爲

師再宿以後之辭此年經左氏無師字或脫字

趙坦春秋 異文箋

公莊二十八年公會齊人宋人邾婁人救鄭

邾婁人三字或衍文左穀無邾人

趙坦異文箋

公僖十八年宋公會曹伯衛人邾婁人伐齊

公羊會字衍

趙坦異文箋

僖二十八年晉侯入曹執曹伯界宋人

是當日界宋人田賜一田字經成而亡之也曹衛嘗侵諸侯之田矣傳載先軫之謀云執曹君而分曹衛之田以賜宋人正此事也晉侯有疾侯孺貨晉史歸曹伯則曹伯之歸自晉不自宋也界之者田而已

葉夢得傳

○按傳執曹伯分曹衛之田界宋人本

係兩事經文闕田字從前只作一事解葉氏此條的解

顧棟高大事表

公僖三十三年晉人及姜戎敗秦于殽

公羊云謂之秦何狄之也按左穀有師字公羊或脫師字傳從

而爲之辭

趙坦異文箋

○愚按劉氏敝胡氏安國王氏沿張氏治諸

家本公羊說俱鑿

公文三年晉陽處父帥師伐楚救江

按二傳脫以字

趙坦異
文箋

公文七年晉人及秦人戰于令狐晉先昧以師奔秦

公羊有以師二字或衍文

趙坦異
文箋

文十年秦伐晉 成三年鄭伐許 昭十二年晉伐鮮虞

秦鄭晉伐國闕書人見外兵不書主帥門

宣元年楚子鄭人侵陳遂侵宋晉趙盾帥師救陳

傳言救陳宋經無宋字蓋闕

杜

○胡傳謂宋有弑逆之罪不當

救故聖筆削之愚謂趙盾黨弑聖人正當直書以正其罪何反
削之春秋有書之以見義者未有沒之以見義者也况陳在宋
南楚之侵必先陳而後及宋晉之救必先宋而後及陳豈有越

宋而南救陳之理乎經當云救宋及陳有脫漏耳

顧棟高大事表

公宣十三年齊師伐衛

按左穀作伐莒是

成三年晉卻克衛孫良夫伐虜咎如

據左傳虜咎如潰上失民也杜注此傳釋經之文蓋經闕虜咎如潰四字孔疏若經本無此文則左公爲橫益經文而加失民之傳故知是經闕也○顧棟高曰劉炫亦同此解

公成六年晉欒書率師侵鄭

案五年盟蟲牢左氏傳云鄭服也故六年楚公子嬰齊帥師伐鄭鄭有楚師故晉欒書帥師救鄭本末如此則非欒書侵鄭可知公羊經作侵鄭既不發傳無從見義當是傳寫之誤

趙坦異文箋

成十三年公會晉侯等伐齊

不書秦師敗績蓋經文闕漏杜注○公親在行則非不告不書克

獲有功又無所諱故云經文闕漏孔疏

襄五年公會晉侯宋公衛侯鄭伯曹伯齊世子光救陳

公穀曹伯下有莒子邾子滕子薛伯八字係左氏脫趙坦異文箋○

據傳戊陳之諸侯即會戚之諸侯惟郕屬魯不與救陳之諸侯

即戊陳之諸侯是左氏經譌脫八字也張壽本古義

公穀襄十七年齊高厚帥師伐我北鄙圍防

接上文齊侯故不繫齊二傳作齊高厚衍齊字趙坦異文箋

公羊定十年叔孫州仇仲孫何忌帥師圍費

公羊作圍費案左氏傳明云秋復圍郕穀梁亦作郕且郕邑屬

叔孫氏故圍郕叔孫為主費邑屬季氏若有事於費帥師者當

為季氏不當獨任叔孫也以是知是郕字公羊譌作費趙坦異文箋

○弑君誤文 弑誤殺殺誤弑誤名

傳九年冬 左穀 晉里克 殺 其君之子奚齊

諸說互異見弑君門

公羊 昭十三年楚公子棄疾弑公子比 弑當從左作殺

汪氏段氏說見大夫相殺門

哀四年盜殺蔡侯申 公穀俱作弑

闕弑吳子壽弑而此書殺不應異同蓋字誤也 趙鵬飛經字 ○宜十

七年書蔡侯申卒葬蔡文公自文至昭纔五世不宜與高祖同

名亦字誤 又本 ○宜公時有蔡侯申此後名申決為譌字而桓

十七年之桓侯成八年之天子非真本觀此益信 高漸然釋經

○晉禮城蒐盟地闕文衍文誤文 置于鈔衍誤辨

莊元年單伯送王姬

當從公穀作逆見王姬下嫁門張氏說

宣五年齊高固來逆叔姬

張氏洽云據高固及子叔姬來當從公穀有子字左氏脫

趙坦其文

僖二年城楚邱

城楚邱之上當先有衛遷于楚邱一句而今闕之耳若上未嘗

有衛遷之文而下忽書城楚邱百世而下讀者安知為衛楚邱

安知為諸侯城楚邱故當有闕文無疑也或謂楚邱之上脫一

衛字是未可知不知文闕故有不予專封之說

顧棟高引高紫楚說

昭八年蒐于紅

傳言大蒐自根牟至于商衛車千乘經不言大闕文也

杜預

襄十五年春宋公使向戌來聘二月己亥及向戌盟于劉

因聘而盟者必在國內荀庚孫良夫卻犇孫林父是也豈有來

聘而遠盟者乎蓋下文有劉夏傳者因以為春夏之夏遂誤增

于劉二字耳

高問集注

○案魯地之劉杜無注孔氏謂城外近地者

蓋疑辭無實據況是時魯所畏事者惟晉而荀庚卻集俱於國

內盟之何獨畏於向戌而盟諸城外乎高氏謂劉乃王畿采地

因下劉夏誤文疑得之

顧棟高大事表

○徐氏說見魯地門

○災異誤文衍文

隱九年三月癸酉大雨震電

左大雨霖以震謹始也凡雨自三日以往為霖杜注此傳解書

霖而經無霖字經誤○按此條公穀俱作大雨震電而左氏獨

作霖以震此蓋左氏所傳授之本異爾後來劉炫之徒俱以為

經誤可見聖經流傳諸弟子古文蝌蚪傳寫錯誤者多矣此條

論記異則霖以震尤屬變怪

顧棟高大事表

○餘見災異門

公羊傳十年冬大雨雹

左穀作大雨雪公羊或因字類而譌趙坦異文箋

穀昭四年春大雨雪

趙說見災異門

穀哀元年麀鼠食郊牛角

左公無角字疑穀梁衍趙坦異文箋

附馬氏通考辨公穀書孔子生

公穀於襄公二十一年皆書孔子生按春秋惟國君世子生則書之子同生是也其餘雖世卿擅國政如季氏之徒其生亦未嘗書之於冊夫子乃鄒邑大夫之子耳魯史未必書也魯史所不書而謂夫子自紀其生之年於所修之經決無是理也而左氏於哀公十四年獲麟之後又復引經以至十六年四月書仲尼卒杜征南

亦以爲近誣然則春秋本文三子以其意見增損者有之矣蓋襄
二十一年所書者公穀尊其師授而增書之也哀十六年所書者
左氏痛其師亡而增書之也俱非春秋之本文也三子者以當時
口耳所傳授者各自爲傳又以其意之所欲增益者攙入之後世
諸儒復據其見於三子之書者互有所左右而發明之而以爲得
聖人筆削之意於千載之上吾未之能信也

馬端臨文獻通考
論三傳經文同異

附左氏引經不及周官儀禮論

周禮六官所掌凡朝覲宗遇會同聘享燕食其期會之疎數幣賦之
輕重牢醴之薄厚各准五等之爵爲之殺而適子誓于天子則下其
君之禮一等未誓則以皮帛繼子男而儀禮有燕禮以享四方之賓
客聘禮以親邦國之諸侯公食大夫禮以食小聘之大夫而覲爲諸
侯秋見天子之禮其米禾薪芻有定數牢鼎几筵蓬豆脯醢有常等

靡不整然具載是宜天下諸侯卿大夫帥以從事若今會典之周敢
踰尺寸而春秋二百四十年若子產之爭承子服景伯之卻百牢未
聞據周禮大行人之職以折服強敵也甯俞之不拜彤弓及湛露叔
孫穆子之不拜四牡及文王未聞述儀禮燕食之禮以固辭好惠也
卻至聘楚而金奏作於下宋享晉侯以桑林之舞皆踰越制度雖恐
懼失席而不聞據周公之典以折之他如鄭成公如宋宋公問禮于
皇武子楚子干奔晉晉叔向使與秦公子同食皆百人之餽而楚靈
大會諸侯問禮于左師與子產左師獻公合諸侯之禮六子產獻伯
子男會公之禮六皆不言其所考據各以當時大小強弱爲之等是
皆春秋博學多聞之士而於周公所制會盟聘享之禮若目未之見
耳未之聞是獨何歟若周公束之高閣未嘗班行列國則當日無爲
制此禮若既行之列國矣而周公之子孫先未有稱述之者豈果升

毫王制不遵法守歟不應舉世盡懵然若此且孔子嘗言吾學周禮
矣而孔子一生所稱引無及今周官一字者孟子言班爵祿之制與
周官互異家語言焉悲曾學士喪禮於孔子而其詳不可得聞夫書
爲孔孟所未嘗道詩書三傳所未經見而忽然出於漢武帝之世其
爲漢之儒者掇拾綴緝無疑雖其宏綱鉅典未嘗不稍存一二而必
過信之爲周公所作則過矣

顧棟高大事表論

春秋屬辭辨例編卷六

春秋屬辭辨例編卷六十終